



Sabtu, 19 September 2020

Ogen: Markus 6:45-52



TETAPKENLAH UKURNDU



Sada si erbanca maka megati bera-bera ukurta ndalani kegeluhen erkiteken la si akap lit si mperdiateken kita. Si sada si akap kita ndalani wari-warinta erdandanken si e maka megati nungkun-nungkun ukurta, uga ngenda pagi kedungenna ateta. Ibas nungkun ukur e, la sitik manusia ndarami ntah ndatken jabapenna. Banci jadi jabapen e erbahan pusuh reh getemna.

Enggo kenca ibere man Jesus lima ribu kalak, isuruhNa leben ajar-ajarNa ngepar Dano Galilea ku Betsaida. Ia jine lawes ertoto si sada. Amin gia Jesus la radu ras ajar-ajarNa i bas perahu e, tapi mataNa tetap mperdiateken perdalanen ajar-ajarNa. Iidah Jesus maka perahu ajar-ajarNa ikenai angina si nungsang ia. Mesera akap ajar-ajar ngkayuh perahuna. Erdandanken si e maka idahiNa ajar-ajar janah erdalan IA i babo lau. Tupung idah ajar-ajarNa IA iakapna begu. Sebab lit pengakap i bas kalak Jahudi maka dano ras lawit eme ingan kerajan iblis. Serko ia kerina. Minter ngerana Jesus man bana kerina nina," Tetapken ukurndu, Aku ngenda, Ula mbiar." Emaka ku das perahu Jesus, angin pe ngadi rembus. Ngidah si e, mamang ate ajar-ajarNa.

Kejadin si bagenda rupa pe megati terjadi i bas kegeluhen enda. Tupung lit perbeben nderpa kegeluhenta nungkun ukurta, janah turah erbage kebiaren ras aru ate. Kepeken sada pengapul man banta sendah maka mata Jesus tetap natap kita, la pernah la idahNa kai si jadi man banta. Tupung lanai kita ngasup ije reh IA nampati kita. La kepe ipeturutNa kita maba si la kita ngasup. Amin megati sisada sikap kita, kelungunen kita, IA teman situhu-tuhu. Erdandanken si e maka i bas mentasi wari-wari si reh enda, entah kai gia deba jadi, ula nai bera-bera ukurta sabab Tuhan tetap nemani ras mperdiateken kita.